

ԵՎՐՈՊԱՅԻ ԵԿԵՂԵՑԻՆԵՐԻ ԿՈՆՖԵՐԱՆՍԻ «ԵԿԵՂԵՑԻ ԵՎ ՀԱՍԱՐԱԿՈՒԹՅՈՒՆ» ՀԱՆՁՆԱԽՄԲԻ ԺՈՂՈՎԸ ՄԱՅՐ ԱԹՈՌՈՒՄ

Հունիսի 15-ին Մայր Աթոռ Սուրբ Էջմիածնում սկսվեց Եվրոպայի Եկեղեցիների Կոնֆերանսի (ԵԵԿ) «Եկեղեցի և հասարակություն» հանձնախմբի ժողովը, որին մասնակցում են շուրջ 35 ներկայացուցիչներ Եվրոպայի քրիստոնեական Եկեղեցիներից: Ժողովի բացումից առաջ Ս. Գայանե վանքում տեղի ունեցավ համատեղ աղոթքի արարողություն, որի ընթացքում ներկաներն աղոթեցին քրիստոնեական Եկեղեցու միասնության և Եկեղեցիների միջև կապերի առավել սերտացման և զորացման համար: Արարողության ընթացքում ներկաներին բարի գալուստ մաղթեց Մայր Աթոռի լուսարարապետ Գերաշնորհ Ս. Արարատ եպիսկոպոս Գալթազճյանը՝ ժողովականներին փոխանցելով Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի օրհնությունն ու բարեմաղթանքը:

Նույն օրը տեղի ունեցավ ԵԵԿ-ի «Եկեղեցի և հասարակություն» հանձնախմբի ժողովի պաշտոնական բացումը, որի ընթացքում ժողովականներին ողջունեց Մայր Աթոռ Սուրբ Էջմիածնի Միջեկեղեցական հարաբերությունների պատասխանատու Գերաշնորհ Ս. Եզնիկ արքեպիսկոպոս Պետրոսյանը: «Մեր Եկեղեցին բաց է ամենքի համար, և մեզ համար մեծ պատիվ է Ձեզ ընդունել և հնարավորություններ ստեղծել Ձեր աշխատանքների բարեհաջող ընթացքի համար: ...Մենք գիտենք, սիրում և պահպանում ենք մեր դավանանքն ու եկեղեցական ավանդությունը, սակայն ցանկանում ենք հարգել և հաղորդ դառնալ քրիստոնեական այլ Եկեղեցիների փորձառությանը ևս», - նշեց Սրբազան Հայրն իր խոսքում: Ապա հանձնախմբի անունից պատասխան խոսքով հանդես եկավ հանձնախմբի համանախագահ տիկին Անթիե Հայդեր Ռոթթվիլը: Նա շնորհակալություն հայտնեց Մայր Աթոռում կազմակերպված ջերմ ընդունելության և Հայոց Եկեղեցու հարուստ հոգևոր ժառանգությանը հաղորդակցվելու հնարավորության համար:

Օրվա նիստերի ընթացքին ժողովականներն առանձին աշխատանքային խմբերում քննարկեցին «Եկեղեցի և հասարակություն» հանձնախմբի առաջնահերթ խնդիրներն անդամ Եկեղեցիներում:

Հանձնախմբում Հայաստանյայց Առաքելական Սուրբ Եկեղեցին ներկայացնում է Մայր Աթոռ Սուրբ Էջմիածնի Միջեկեղեցական հարաբերությունների գրասենյակի վարիչ Հոգեշնորհ Ս. Հովակիմ վարդապետ Մանուկյանը:

ԵՎՐՈՊԱՅԻ ԵԿԵՂԵՑԻՆԵՐԻ ԿՈՆՖԵՐԱՆՍ

Եվրոպայի Եկեղեցիների Կոնֆերանսը (ԵԵԿ) 126 Եկեղեցիների ընկերակցություն է, որի հետ համագործակցում են Եվրոպա մայրցամաքի բոլոր երկրներից 43 կազմակերպություններ: Այն հիմնադրվել է 1959 թ. և գրասենյակներ ունի Ժնևում, Բրյուսելում և Ստրասբուրգում:

ՀԱՅՈՑ ԵԿԵՂԵՑՈՒ ՄԱՍՆԱԿՑՈՒԹՅՈՒՆԸ ԵԵԿ-ԻՆ

Մայր Աթոռ Սուրբ Էջմիածինը Եկեղեցիների Եվրոպական Կոնֆերանսի անդամ է 1977 թ.: 2003 թ. հունիսի 25-ից հուլիսի 2-ը Նորվեգիայի Թրոնդհայմ քաղաքում տեղի ունեցավ Եվրոպայի Եկեղեցիների Կոնֆերանսի 12-րդ Գլխավոր Ասամբլեան, որին մասնակցեց Հայոց Եկեղեցու պատվիրակությունը: Ասամբլեայի ընթացքում Մայր Աթոռի Միջեկեղեցական հարաբերությունների պատասխանատու Ս. Եզնիկ արքեպս. Պետրոսյանն ընտրվեց ԵԵԿ Կենտրոնական Կոմիտեի անդամ: Նույն տարի այս կառույցին անդամակցեցին Մայր Աթոռի միաբան Ս. Հովակիմ վրդ. Մանուկյանը՝ որպես «Եկեղեցի և հասարակություն» հանձնախմբի անդամ, և երեցկին Փոլա Դևեջյանը՝ «Եկեղեցի և հասարակություն» հանձնախմբի «Արդարություն, խաղաղություն և հաշտություն» աշխատանքային խմբի անդամ: Այս տարիներին Մայր Աթոռն իր պաշտոնական տեսակետն է հայտնել Եվրամիությանը Թուրքիայի անդամակցության հարցի և «Կարտա Էկումենիկա» կոչվող փաստաթղթի վերաբերյալ, որը վերաբերվում է Եկեղեցիների համագործակցության նոր ձևերին, ժողովուրդների ու կրոնների միջև երկխոսության հաստատմանը:

Անդամակցելով այս կառույցներին՝ Հայ Եկեղեցին ևս իր կարևոր նպաստն է բերում Էկումենիկ զարգացմանը: Միջեկեղեցական հարաբերություններում հատկապես կյանքի է կոչել ԵՀՄ-ի և Էկումենիկ շարժման տեսականի կարևոր կետերից մեկը՝ համագործակցությունը Եկեղեցիների ու քրիստոնեական հարանվանությունների ներկայացուցիչների հետ:

2004 թ. հոկտեմբերի 5-ին ԵԵԿ-ի «Եկեղեցի և հասարակություն» հանձնախմբի գործադիր կոմիտեն Թուրքիայի անդամակցության հարցի շուրջ հանդես է եկել հայտարարությամբ՝ նշելով. «Եվրամիությունը պետությունների և ազգերի մի համայնք է, ուր պարտադիր են փաստաթղթերով հռչակված արդարության և խաղաղության, համերաշխության և բազմազանության, հաշտության և հանդուրժողականության, խոսքի ազատության և փոխադարձ հարգանքի արժեքները, և Եվրամիությունը ջանքեր է ի գործ դնում՝ դրանք ամենօրյա կյանքի մասը դարձնելու համար: Ներկա փուլում Թուրքիայում այս արժեքների միևնույն արտահայտությունը մենք չենք տեսնում: Տակավի՛ն բանտերում բռնությունների, խոսքի ազատությունն ընդունելու խնդիրների, ինչպես նաև ազգային փոքրամասնությունների հանդեպ ճնշումների մասին հաղորդումներ են լինում: Պատմության ճշմարիտ հետազոտությունը, մասնավորապես դրա այն մասը, որ առնչվում է Թուրքիայի հարաբերություններին հարևան երկրների հետ և որն ընդգրկում է պատճառած ցավերի և վիրավորանքների ճանաչումը, նախապայման է հասարակության մեջ հիշողության վերաբեր թժկելու և ճշմարիտ հաշտեցման: Այն դեռ ձեռք բերված չէ: Այս առումով հայ փոքրամասնության հետ հարաբերությունը հատուկ ուշադրության է արժանի: ...Այս առումով Եվրոպայի Եկեղեցիներն արտահայտում են իրենց խորը անհանգստությունը քրիստոնեական փոքրամասնությունների վերաբերյալ: Չնայած Թուրքիայի պատասխանատու իշխանությունների խոստումներին, երկրում քրիստոնեական համայնքները տակավի՛ն շատ խնդիրների են բախվում օրինական ճանաչման, սեփականատիրական իրավունքների և կրթական ծրագրի զարգացման հարցերում»:

2005 թ. Մեծ Եղեռնի 90-ամյակի առիթով ԵԵԿ-ն հայտարարությամբ դատապարտեց Հայոց Ցեղասպանությունը և կոչ արեց անդամ Եկեղեցիներին՝ այդ օրը աղոթելու հայ նահատակների հոգիների խաղաղության համար:

ԵԵԿ-ի «ԵԿԵՂԵՑԻ ԵՎ ՀԱՄԱՐԱԿՈՒԹՅՈՒՆ» ՀԱՆՁՆԱԽՈՒՄԸ

ԵԵԿ-ի «Եկեղեցի և հասարակություն» հանձնախումբն ստեղծվել է 1999 թ. որպես արդյունք ԵԵԿ-ի և Եվրոպայի Էկումենիկ հանձնախմբի «Եկեղեցի և հասարակություն» հանձնախմբի երկարատև աշխատանքի և միացման գործընթացի: Հանձնախմբի աշխատանքներին մասնակցում են 125 անդամ Եկեղեցիներ ողջ Եվրոպայից, որոնք հարաբերվում և համագործակցում են Եվրամիության կառույցների և Եվրախորհրդի հետ: Այն բաժանմունքներ ունի Բյուրսելում և Ստրասբուրգում, ինչպես նաև ամուր կապ ժնևի ԵԵԿ-ի բաժնի հետ: «Եկեղեցի և հասարակություն» հանձնախմբի տնօրինության նստավայրը Բյուրսելն է: Հանձնախմբի նպատակներն են.

- խթանել Էկումենիկ երկխոսությունը և համագործակցությունն անդամ Եկեղեցիների միջև հատկապես Եկեղեցուն և հասարակությանը հուզող խնդիրներում,
- հնարավորություն ստեղծել անդամ Եկեղեցիների համար՝ հանդիպելու և ուղիներ փնտրելու համար հանուն բարօր Եվրոպայի,
- քաջալերել քրիստոնեական ներդրումը Եվրոպայի քաղաքական, սոցիալական և տնտեսական կյանքում,
- որպես Եվրոպական կառույցների ուժեղ գործակից՝ աջակցել Եվրոպական համերաշխությանը, հաշտեցմանը և մարդկային արժանապատվության պաշտպանմանը:

Հանձնախմբի գործունեության շրջանակներում երկարաժամկետ խմբեր են հաստատվել 2004-2009 թթ. աշխատանքային հետևյալ ծրագրերի համար.

- Եվրոպական ինտեգրում
- Եվրախորհրդի օրենսդրություն
- խաղաղություն, ապահովություն և հաշտեցում
- բիոէթիկա և բիոտեխնիկա
- մարդու իրավունքներ և կրոնի ազատություն
- սոցիալական խնդիրներ

ԵԵԿ-ն նաև աշխատանքներ է տանում հետևյալ ուղղություններով.

- գլոբալիզացիա
- կայուն զարգացում
- տարածքային խնդիրներ
- գյուղատնտեսություն և գյուղական կյանք
- սեռերի հավասարություն
- կրթություն
- միջկրոնական երկխոսություն



ՀԱՆՁՆԱԽՄԱԲԻ ԱՆՂԱՄԱՆԵՐԸ ԼՈՐԻՆ ՍՐԲՈՒԹՅԱՆ ՆԵՏ ՎԵՆԱՊԱՆԻ ՄՈՒՏՔԻՆ